


A.V.B. A CELEBRA 65 ANA DI EXISTENCIA



ORANJESTAD (AAN)-Diaranzon anochi e directiva actual di Arubaanse Voetbal Bond a recorda e echo cu e organizacion aki a cumpli 65 aña di existencia. A.V.B. ta e federacion deportivo mas bieu aki na Aruba y nan ta tambe esun di mas grandi, representando un cantidad grandi di clubnan activo.

Futbol ta e deporte Rey di Aruba aunque cu dene ultimo temponan nos por a nota un adelanto leve den e otro ramonan di deporte riba nos isla.

Diaranzon anochi durante un ceremonia bunita na Indian Rock Garden esnan cu a sigui e curso pa entrenador hubenil a ricibi nan certificado.

E instructor John Moens den su discurso a accentua e importancia di un bon nivel di e deporte cerca e hubenilnan.

Hopi interesa e ta pa dunaun continuacion di e curso aki na Aruba pa hisa e nivel dinos futbol.

Deporte awendia mester ser studia ya cu deporte a bira ciencia.



Tambe e maximogoleador di e campeonato Division Honor Rafael Vanegas di R.C.A. a ricibi su trofeo correspondiente.

Manera nos por corda cu pa motibo di un error esaki no a tuma lugar na ciere di e campeonato.

Tambe e directiva actual a homenagea algun dirigente y ex-dirigente di futbol.

Tabata un acto masha bunita mes ya cu ta sosode masha hopi cu dirigentenan ta ser lubida mientras cu hopi di nan ta dedica hopi tempo, practicamente nan bida na nan deporte favorito.

Esnan cu Diaranzon a ricibi un plakaat di reconocimiento tabata Emerald Werleman di Caravel kende por cierto te ainda ta activo.

Vicente Henriquez di Bubali, Luareano "Naño" Donati di Santa Fe y Daniel "Danchi" Kelly di R.C.A., Simeon Geerman di Jong San Nicolaas y tambe Jacinto "Chinto" Werleman.

Tambe Fransisco "Pancho" Wever, Ovid Orman y Salomon de Castro kendenan pa motibo di salud ya no ta activo, a ricibi nan plakaat di reconocimiento pa nan dedicacion.

For di e representante di A.S.U. Barkmeyer e presidente actual Charles "Boei" Marchena a ricibi un plakaat en coneccion cu e fecha tan memorable aki.

Tambe Buchi "Panama" Wever den number di Lifida a haci entrega di un plakaat na A.V.B.

Tabata un anochi ameno na unda varios discurso a ser duna pa entre otro Su Excelencia Ministro Glenbert Croes kende a expresa e deseo di mira cu algun dia Aruba lo gana un mundial. Despues di e parti oficial e invitadonan por a saborea un suculento cuminda di catering.

Riba e combinacion di foto nos por mira varios momento di e anochi.